



2,010 Pelajar Baharu Siswazah Lafaz Ikrar Semester Pertama 2009/2010



Pelajar baharu siswazah ketika melafaz ikrar di UPM semalam.

SERDANG, 20 Ogos – Seramai 2,010 pelajar baharu pasca siswazah semester pertama 2009/2010 Universiti Putra Malaysia (UPM) Sekolah Pengajian Siswazah (SPS) telah melafazkan ikrar sebagai simbolik untuk mereka memulakan pengajian di kampus ini.

Naib Canselor UPM, Prof. Datuk Dr. Nik Mustapha R. Abdullah berkata jumlah keseluruhan enrolmen pelajar pasca siswazah pada semester ini ialah 8,585 iaitu 6,025 pelajar sarjana dan 2560 pelajar PhD.

“Jumlah 2,429 pelajar antarabangsa pada masa ini memberi petunjuk baik bahawa UPM sebagai destinasi pilihan pelajar pasca siswazah,” katanya ketika merasmikan majlis lafaz ikrar di sini.

Beberapa pelajar baharu yang ditemui wartawan Tribun Putra selepas majlis tersebut memberikan reaksi pelbagai apabila menjadikan UPM sebagai institusi pilihan pengajian.

Antaranya Imas Sukaesih Sitanggang, 34, yang memilih UPM dalam bidang Sains Komputer peringkat PhD kerana status universiti itu sebagai salah sebuah universiti penyelidikan bertaraf antarabangsa.

“Saya amat bangga menjadi salah seorang pelajar UPM dan berharap dapat berkongsi ilmu yang dipelajari di sini dengan pelajar-pelajar saya di Indonesia bila tamat pengajian nanti,” katanya yang merupakan pensyarah Universiti Pertanian Bogor, Indonesia.

Rwaveno Bamaiyi, 36, dari Nigeria berkata beliau memilih UPM kerana nama UPM kerap meniti di bibir rakan-rakannya yang belajar di Malaysia sebagai sebuah universiti penyelidikan yang terkemuka di rantau Islam.

“Saya mengambil kursus PhD dalam bidang Public Health di Fakulti Perubatan Veterinar, UPM kerana fasiliti pembelajaran yang lengkap. Lagipun saya berhasrat untuk memberi pendedahan mengenai bidang ini kepada rakyat Nigeria,” katanya yang sebelum ini mempunyai ijazah sarjana dari Ahmadu Bello University, Zaria, Nigeria.



Rwaveno Bamaiyi, 36 salah seorang siswazah antarabangsa dari Nigeria.

Aiman Dandi, 29, dari Libya berkata UPM menjadi pilihannya kerana kualiti pendidikan yang bermutu dan Malaysia merupakan negara Islam seperti negaranya.

“Saya mengambil kursus sarjana Applied Radiation di Fakulti Sains UPM. Walaupun saya mempunyai ijazah Nuclear Engineering dari Al-Fatah Universiti di Libya tetapi bidang yang saya ambil di UPM ini mempunyai kaitan,” katanya yang bercadang untuk bekerja di Malaysia.

Tidak ketinggalan ialah graduan orang kurang upaya (OKU) Nurul Atikah Salim, 22, yang melanjutkan pelajaran di peringkat sarjana dalam bidang Pentadbiran Perniagaan walaupun baru sahaja bergraduasi pada Majlis Konvokesyen UPM ke-33 baru-baru ini.



Nurul Atikah Salim, 22 pelajar OKU.

"Ilmu yang ada masih belum cukup. Lagipun saya masih belum bersedia untuk bekerja kerana terpaksa menggunakan alat sokongan kaki ketika berjalan," katanya yang berjaya membuktikan kekurangan yang dimiliki sejak lahir tidak membataskan usahanya.

Wartawan Tribun Putra juga turut menemui pasangan adik beradik iaitu Annie Yong Ing Ing, 23, dan abangnya Yong Hua Long, 32, kedua-duanya berasal dari Sibu, Sarawak yang sama-sama mengambil kursus MBA.



Pasangan adik-beradik, Annie Yong Ing Ing, 23 (kiri) dan Yong Hua Long, 32.

"Kami membuat keputusan bersama-sama mengambil kursus MBA di UPM kerana kursus MBA di UPM agak popular dan mempunyai reputasi terbaik," kata Annie yang berjaya memujuk abangnya untuk meneruskan pelajaran bersamanya.

Disediakan oleh Seksyen Media dan Publisiti, Bahagian Komunikasi Korporat UPM.

